

## 阿毗達磨法蘊足論卷第九

尊者大目乾連造

三藏法師玄奘奉 詔譯

### 覺支品第十五之餘

云何輕安覺支？謂世尊說：慶喜當知！入初靜慮時，語言靜息，由此爲緣，餘法亦靜息，此名第一順輕安相。入第二靜慮時，尋伺靜息，由此爲緣，餘法亦靜息，此名第二順輕安相。入第三靜慮時，諸喜靜息，由此爲緣，餘法亦靜息，此名第三順輕安相。入第四靜慮時，入出息靜息，由此爲緣，餘法亦靜息，此名第四順輕安相。入滅想受定時，想受靜息，由此爲緣，餘法亦靜息，此名第五順輕安相。慶喜當知！復有第六上妙輕安，是勝，是最勝，是上，是無上，如是輕安，最上最妙，無餘輕安能過此者。此復云何？謂心從貪離染解脫，及從瞋、癡、離染解脫，此名第六順輕安相。思惟此相，所有無漏作意相應，諸身輕安，心輕安，輕安性，輕安類，總名輕安，亦名輕安覺支；是聖出世無漏

無取道、隨行道、俱有道隨轉，能正盡苦，作苦邊際；諸有學者，如所見諸行，思惟觀察，令至究竟；於諸行中，深見過患，於永涅槃，深見功德；若阿羅漢，如解脫心，思惟觀察，令至究竟；所有無漏作意相應，諸身輕安，心輕安，輕安類，是名輕安覺支。

云何定覺支？謂世尊說：苾芻當知！我說依初靜慮，能盡諸漏，如是我說依第二、第三、第四靜慮，空無邊處，識無邊處，無所有處，能盡諸漏。苾芻當知！我依何故作如是說：依初靜慮，能盡諸漏，謂有苾芻，先由如是諸行相狀，離欲惡、不善法，有尋有伺，離生喜樂，初靜慮具足住；彼不思惟如是諸行相狀，但思惟彼所得所趣色受想行識，謂此諸法，如病如癰，如箭惱害，無常苦空非我，彼於此法，深心厭患，怖畏遮止，然後攝心，置甘露界；思惟此界，寂靜微妙，捨一切依愛盡離染，永滅涅槃。如善射師，或彼弟子，先學近射泥團草人，後能遠射大堅固物，亦令破壞。苾芻亦爾！先由如是諸行相狀，離欲惡、不善法，有尋有伺，離生喜樂，初靜慮具足住；彼不思惟如是諸行相狀，但思惟彼所得所趣色受想行識，謂此諸法，如病如癰，如箭惱害，無常苦空非我，彼於此法，深心厭患，怖畏遮止，然後攝心，置甘露界；思惟此界，寂靜微妙，捨一切依愛盡

離染，永滅涅槃。彼如是知，如是見故，便從欲漏心得解脫，亦從有漏及無明漏，心得解脫，既解脫已，能自知見，我得解脫，我生已盡，梵行已立，所作已辦，不受後有。我依此故作如是說：依初靜慮，能盡諸漏。如說依初靜慮能盡諸漏，說依第二、第三、第四靜慮，空無邊處，識無邊處，無所有處，能盡諸漏，隨所應亦爾，謂第二靜慮，應作是說：復有苾芻，先由如是諸行相狀，尋伺寂靜，內等淨心一趣性，無尋無伺，定生喜樂，第二靜慮具足住；彼不思惟如是諸行相狀，乃至廣說，乃至無所有處，應作是說：復有苾芻，先由如是諸行相狀，超一切種識無邊處，入無所有無所有處，具足住；彼不思惟如是諸行相狀，但思惟彼所得所趣受想行識，乃至廣說。苾芻當知！乃至想定能辦如是所應作事，復有非想非非想處，及滅盡定，我說於彼脩定，苾芻應數入出，彼脩如是七依定時，所有無漏作意相應，心住等住，乃至心一境性，總名爲定，亦名定根，亦名定力，亦名定覺支，亦名正定；是聖出世無漏無取道，隨行道，俱有道隨轉，能正盡苦，作苦邊際；諸有學者，如所見諸行，思惟觀察，令至究竟；於諸行中，深見過患，於永涅槃，深見功德；若阿羅漢，如解脫心，思惟觀察，令至究竟；所有無漏作意相應，

心住等住，乃至心一境性，是名定覺支。

云何捨覺支。謂有苾芻，思惟斷界、離界、滅界，由此發起心平等性、心正直性、心無警覺寂靜住性。彼作是念：我今應於順貪、順瞋、順痴、諸法，離貪、瞋、痴，由此發起心平等性、心正直性、心無警覺寂靜住性。復作是念：我今應於貪、瞋、痴法，心不攝受，由此發起心平等性、心正直性、心無警覺寂靜住性。彼審思惟六順捨法，所有無漏作意相應，心平等性、心正直性、心無警覺寂靜住性，總名為捨，亦名捨覺支。是聖出世無漏，無取道、隨行道，俱有道隨轉，能正盡苦，作苦邊際。諸有學者，如所見諸行，思惟觀察，令至究竟；於諸行中，深見過患，於永涅槃，深見功德；若阿羅漢，如解脫心，思惟觀察，令至究竟；所有無漏作意相應，心平等性、心正直性、心無警覺寂靜住性，是名捨覺支。

雜事品第十六

一時，薄伽梵，在室羅筏，住逝多林，給孤獨園。爾時世尊，告苾芻衆：汝等若能永斷一法，我保汝等定得不還一法，謂貪若永斷者，我能保彼定得不還，如是瞋、癡、忿、恨、覆。

惱、嫉、慳、誑、誑、無慙、無愧、慢、過慢、慢過慢、我慢、增上慢、卑慢、邪慢、憍、放逸、傲、憤發、憍妄、詭詐、現相、激磨、以利求利、惡欲、大欲、顯欲、不喜足、不恭敬、起惡言、樂惡友、不忍、耽嗜、遍耽嗜、染貪、非法貪、著貪、惡貪、有身見、有見、無有見、貪欲、瞋、恚、沈、睡眠、掉舉、惡作、疑、瞋、不樂、頻申、欠、吐、食、不調性、心昧劣性、種種想、不作意、羸重、舐突、饕餮、不和、輒性、不調、柔性、不順、同類、欲、尋、恚、尋、害、尋、親、里、尋、國、土、尋、不、死、尋、陵、蔑、尋、假、族、尋、愁、歎、苦、憂、擾、惱、於此一法，若永斷者，我能保彼定得不還，爾時世尊，為攝前義，而說頌曰：

貪所繫有情， 數往諸惡趣， 智者能正斷， 不還此世間。

如是瞋、癡，乃至擾惱，一一別頌，如貪應知。

云何貪？謂於欲境，諸貪等貪，執藏防護，堅著愛樂迷悶，耽嗜、遍耽嗜，內縛、希求，耽湎、苦集、貪類、貪生，總名為貪。

云何瞋？謂於有情，欲為損害，內懷栽杙，欲為擾惱，已瞋、當瞋、現瞋、樂為過患，極為過患，意極憤恚；於諸有情，各相違戾，欲為過患，已為過患，當為過患，現為過患，總名為瞋。

云何癡？謂於前際無知，後際無知，前後際無知；於內無知，外無知，內外無知；於業無知，異熟無知，業異熟無知；於善作業無知，惡作業無知，善惡作業無知；於因無知，因所生法無知；於佛無知，法無知，僧無知；於苦無知，集無知，滅無知，道無知；於善法無知，不善法無知；於有罪法無知，無罪法無知；於應脩法無知，不應修法無知；於下劣法無知，勝妙法無知；於黑法無知，白法無知；於有敵對法無知，於緣生法無知；於六觸處如實無知，如是無知無見，非現觀黑闇愚癡，無明盲冥，罽網纏裹，頑駮渾濁，障蓋發盲，發無眼，發無智，發劣慧，障得善品，令不涅槃；無明漏，無明瀑流，無明軛，無明毒根，無明毒莖，無明毒枝，無明毒葉，無明毒花，無明毒果，癡等癡，極癡，欣等欣，極欣，癡類癡生，總名爲癡。

云何忿？謂忿有二種：一屬愛忿，二屬非愛忿。屬愛忿者：謂於父母、兄弟、姊妹、妻妾、男女，及餘隨一親屬朋友所發生忿怒，有忿言，如何不與我此物，而與我如是物？如何不與我作此事，而與我作如是事？由此發生諸忿，等忿、遍忿、極忿、已忿、當忿、現忿、熱極熱、烟極烟、焰極焰、凶勃麤惡，心憤發，起惡色，出惡言，是名屬愛忿。屬非愛忿者：謂

有一類，作是思惟：彼今於我欲爲無義，欲爲不利益，欲爲不安樂，欲爲不滋潤，欲爲不安隱；然彼於我已作無義，當作無義，現作無義，諸有於我欲爲無義，乃至不安隱；而復於彼欲爲有義，欲爲利益，欲爲安樂，欲爲滋潤，欲爲安隱；然復於彼已作有義，當作有義，現作有義，諸有於我欲爲有義，乃至安隱；而復於彼欲爲無義，乃至不安隱；由此發生諸忿，等忿，乃至起惡色，出惡言，是名屬非愛忿。此屬愛、非愛，總名爲忿。云何恨？謂有一類，作是思惟：彼既於我欲爲無義，廣說如前，我當於彼亦如是作，此能發忿，從瞋而生，常懷憤結，諸恨，等恨、遍恨、極恨，作業難迴，爲業纏縛，起業堅固，起怨、起恨、心怨恨性，總名爲恨。

云何覆？謂有一類，破戒、破見、破淨命、破軌範，於本受戒不能究竟，不能純淨，不能圓滿，彼既自覺所犯已久，作是思惟：我若向他宣說開示，施設建立，所犯諸事，則有惡稱惡譽，被彈被厭，或毀或舉，便不爲他恭敬供養，我寧因此墮三惡趣，終不自陳上所犯事，彼既怖得惡稱惡譽，乃至怖失恭敬供養，於自己所犯，便起諸覆，等覆、遍覆、隱等隱、遍隱、護等護、遍護、藏等藏、遍藏，已覆、當覆、現覆，總名爲覆。

云何惱？謂有一類，於僧等中，因法非法，而興鬪訟，諸苾芻等爲和息故，勸諫教誨，而固不受，此不受勸諫性，不受教誨性，極執性，極取性，左取性，不右取性，難勸捨性，拙應對性，師子執性，心蛆螫性，心狼戾性，總名爲惱。

云何嫉？謂有一類，見他獲得恭敬供養，尊重讚歎，可愛五塵衣服飲食，臥具醫藥，及餘資具，作是思惟：彼既已獲恭敬等事，而我不得，由此發生諸戚，極戚，苦極苦，妬極妬，嫉極嫉，總名爲嫉。

云何慳？謂慳有二種，一、財慳，二、法慳。財慳者：謂於諸所有可愛五塵衣服飲食，臥具醫藥，及餘資具，障礙遮止，令他不得；於自所有可愛資具，不施，不遍施，不隨遍施，不捨，不遍捨，不隨遍捨，心悵惜性，是名財慳。法慳者：謂所有素怛纘，毗柰耶，阿毗達磨，或親教軌範教授教誡，或展轉傳來諸秘要法，障礙遮止，令他不得；於自所有如上諸法，不授與他，亦不爲說，不施，不遍施，不隨遍施，不捨，不遍捨，不隨遍捨，心悵惜性，是名法慳。此財法慳，總名爲慳。

云何誑？謂於他所，以僞斗，僞斛，僞秤，詭言施託誑誘，令他謂實，諸誑等誑，遍誑，極誑，

### 總名爲誑。

云何諂？謂心隱慝性，心屈曲性，心洄復性，心沈滯性，心不顯性，心不直性，心無堪性，總名爲諂。

云何無慙？謂無慙，無所慙，無別慙，無羞，無所羞，無別羞，無敬，無敬性，無自在，無自在性，於自在者，無怖畏轉，總名無慙。

云何無愧？謂無愧，無所愧，無別愧，無恥，無所恥，無別恥，於諸罪中，不怖不畏，不見怖畏，總名無愧。

云何慢？謂於劣，謂己勝，或於等，謂己等，由此起慢，已慢當慢，心舉恃，心自取，總名爲慢。

云何過慢？謂於等，謂己勝，或於勝，謂己等，由此起慢，乃至心自取，總名過慢。

云何慢過慢？謂於勝，謂己勝，由此起慢，乃至心自取，總名慢過慢。

云何我慢？謂於五取蘊等，隨觀見我或我所，由此起慢，乃至心自取，總名我慢。

云何增上慢？謂未得謂得，未獲謂獲，未觸謂觸，未證謂證，由此起慢，乃至心自取，總

名增上慢。

云何卑慢？謂於多勝，謂已少劣，由此起慢，乃至心自取，總名卑慢。

云何邪慢？謂已無德，而謂有德，由此起慢，乃至心自取，總名邪慢。

云何憍？謂有一類，作是思惟：我之種姓、家族色力、工巧事業、若財若位、戒定慧等，隨一殊勝，由此起憍。極憍、醉、極醉、悶、極悶、心傲逸、心自取、起等起、生等生、高等高、舉等舉、心彌漫性，總名為憍。

云何放逸？謂於斷不善法、集善法中，不修不習，不恆作，不常作，捨加行，總名放逸。

云何傲？謂有一類，應供養者而不供養，應恭敬者而不恭敬，應尊重者而不尊重，應讚歎者而不讚歎，應問訊者而不問訊，應禮拜者而不禮拜，應承迎者而不承迎，應請坐者而不請坐，應讓路者而不讓路，由此發生，身不卑屈，不極卑屈，身傲心傲，自傲誕性，總名為傲。

云何憤發？謂身擒害性，心擒害性，身戰怒性，心戰怒性，身憤發，心憤發，已憤發，當憤發，總名憤發。

云何矯妄？謂多貪者，為供養故，為資具故，為恭敬故，為名譽故，拔髮燻髭，臥灰露體，徐行低視，高聲現威，顯自伎能，苦行等事，總名矯妄。

云何詭詐？謂多貪者，為得如前供養等故，往至他家作如是語：汝等今者善得人身，諸有誦持經律對法，善說法要，妙閑傳記，製造疏論，樂阿練若，樂但三衣，樂常旋禮，樂糞掃衣，樂行乞食，樂一鉢食，樂一受食，樂一坐食，樂居樹下，樂居露地，樂處塚間，樂坐不臥，樂隨得坐，得不淨觀，得持息念，得四靜慮，得四無量，得四無色，得四聖果，得六通慧，得八解脫，此等賢聖，但入汝家，皆得汝等供養恭敬，尊重讚歎，為作依怙，我之行德，未減前人，今至汝家，固望同彼，是名詭詐。復有詭詐，謂多貪者，為得如前供養等故，往至他家作如是語：汝應於我如父母想，我亦於汝如男女想，自今已後，共為親眷，憂喜榮辱，咸悉是同，先來世間，汎號於我，為沙門釋子，從今向去，皆悉稱我為汝家沙門，凡我所須資身眾具，衣藥等物，汝皆見供，汝若不能，我脫別往餘敬信家，汝豈不辱，如是所作種種不實，方便語言，總名詭詐。

云何現相？謂多貪者，為得如前供養等故，往至他家作如是語：賢士賢女，此衣此鉢，

此坐臥具，此衫裙等，我若得之，甚爲濟要，當常寶護，以福於汝，除汝能捨，誰當見惠，作此方便而獲利者，總名現相。

云何激磨？謂多貪者，爲得如前供養等故，往至他家作如是語：汝父母等，具足淨信，戒聞捨慧，乘斯善業，已生人天，及得解脫，而汝無信戒聞捨慧，既無善業，後若命終，定生惡趣，其如之何，如是讚毀以求利者，總名激磨。

云何以利求利？謂有一類，先從餘家，求得衣鉢，及餘隨一支身命緣，持往餘家，而現之曰：彼某甲家，與我此物，然彼施主，於長時中，恒資給我衣鉢等物，汝家若能如彼施者，便亦是我所依止處，因前方便，獲後利者，如是總名以利求利。

云何惡欲？謂有一類，實不誦持經律對法，廣說乃至實非證得八解脫者，而欲令他，知已實是誦持經律對法等者，因斯而得供養恭敬，尊重讚歎，爲作依怙；又自實無出家遠離所生善法，而爲他人，宣說開示，顯已證得，如斯等類，總名惡欲。

云何大欲？謂多貪者，爲得廣大財利等故，而起於欲，已欲當欲，總名大欲。

云何顯欲？謂有一類，實是誦持經律對法，廣說乃至得持息念，及得預流一來果者，

但無名譽，人所不知，意欲令他知有此德，因斯便獲供養恭敬，尊重讚歎，爲作依怙；又自實有出家遠離所生善法，而爲他人，宣說開示，顯已證得，如斯等類，總名顯欲。云何不喜足？謂有一類，於已獲得色香味觸，及餘資具，不生喜足，復悌復欲，復樂復求，總名不喜足。

云何不恭敬？謂有一類，若親教親教類，軌範軌範類，及餘隨一尊重可信，往還朋友，如法告言：汝從今去，勿壞身業，勿壞語業，勿壞意業，勿行不應行處，勿親近惡友，勿作三惡趣業，如是教誨，稱法應時；於所脩道，隨順磨瑩，增長嚴飾，宜使常委，助伴資糧；而彼有情，不欣不喜，不愛不樂，於師等言，違戾左取，而不右取，毀訾非撥，諸如是等，名不恭敬。

云何起惡言？謂有一類，若親教親教類，軌範軌範類，及餘隨一尊重可信，往還朋友，如法告言：汝從今去，勿壞身業，勿壞語業，勿壞意業，勿行不應行處，勿親近惡友，勿作三惡趣業，如是教誨，稱法應時；於所脩道，隨順磨瑩，增長嚴飾，宜使常委，助伴資糧；而彼有情，不欣不喜，不愛不樂，於師等言，違戾左取，而不右取，毀訾非撥，及於師

等，起勃魯言，諸如是等，名起惡言。

云何樂惡友？謂有一類，好近惡友，言惡友者：謂諸屠羊、屠鷄、屠猪、捕鳥、捕魚、獵獸、劫盜、魁膾、典獄、縛龍、煮狗、及置菴等，是名惡友；復有一類，毀犯尸羅，習行惡法，內懷腐敗，外現堅貞，類穢蝸牛、螺、音狗行，實非沙門，自稱沙門，實非梵行，自稱梵行，亦名惡友；於如是等諸惡友所，親近承事，隨順愛樂，名樂惡友。

云何不忍？謂有一類，不能堪忍寒熱、飢渴、風雨、蚊蚋、蛇蠍、惡觸，及餘苦事；復有一類，於他暴惡，能發自身，猛利剛強，切心奪命，辛楚苦受，凶勃穢言，不能堪忍；卽此及前，總名不忍。

云何耽嗜遍耽嗜？謂下品貪瞋癡纏，名耽嗜；卽此中品，名遍耽嗜。復次：中品貪瞋癡纏，名耽嗜，卽此上品，名遍耽嗜。

云何染貪？謂於諸欲諸貪等貪，乃至貪類貪生，總名染貪。

云何非法貪？謂於母女姊妹，及餘隨一親眷，起貪等貪，執藏防護，堅著愛染，名非法貪。

云何著貪？於自財物，及所攝受，起貪等貪，執藏防護，堅著愛染，是名著貪。

云何惡貪？謂於他財物，及所攝受，起貪等貪，執藏防護，堅著愛染，是名惡貪；復有惡貪，規他生命，貪皮角等，飲血噉肉；如是二種，總名惡貪。

云何有身見？謂於五取蘊，起我，我所想，由此生忍樂慧觀見，名有身見。

云何有見？謂於我及世間，起常恆想，由此生忍樂慧觀見，是名有見。

云何無有見？謂於我及世間，起非常非恆想，由此生忍樂慧觀見，名無有見。

云何貪欲？謂於諸欲境，起欲樂欣喜，求趣悌望，是名貪欲。有作是說：於諸欲境，諸貪等貪，乃至貪類貪生，總名貪欲。

云何瞋恚？謂於諸有情，欲爲損害，內懷栽杙，乃至現爲過患，總名瞋恚。

云何憒沈？謂身重性，心重性，乃至憂鬱憤悶，總名憒沈。

云何睡眠？謂諸眠夢，不能任持，心昧畧性，總名睡眠。

云何掉舉？謂心不寂靜，掉舉等掉舉，心掉舉性，總名掉舉。

云何惡作？謂心變、心懊、心悔、我惡作、惡作性，總名惡作。



云何疑？謂於佛法僧及苦集滅道，生起疑惑，二分二路，乃至非現一趣，總名為疑。  
云何瞢憤？謂身重性、心重性，身無堪任性，心無堪任性，身瞢憤性、心瞢憤性，已瞢憤，當瞢憤，現瞢憤，總名瞢憤。

云何不樂？謂有一類，得好親教、親教類、軌範、軌範類，及餘隨一尊重可信，往還朋友，教誡教授，繫念思惟，房舍臥具，而心不喜，不愛不樂，悵望慘感，總名不樂。

云何頻申欠喏？謂身低舉，手足捲舒，名曰頻申。鼻面開蹙，唇口喎張，名為欠喏。

云何食不調性？謂以不食，或食過量，或食匪宜，而生苦受，總名食不調性。

云何心昧劣性？謂心昏昧，劣弱捲跼，總名心昧劣性。

云何種種想？謂有蓋纏者，所有染汗、色聲香味觸想，不善想，非理所引想，障礙定想，總名種種想。

云何不作意？謂於出家、遠離所生善法，不引發，不憶念，不思惟，不已思惟，不當思惟，心無警覺，總名不作意。

云何麤重？謂身重性、心重性，身無堪任性，心無堪任性，身剛強性、心剛強性，身不調

柔性，心不調柔性，總名麤重。

云何觶突？謂有一類，於授食時，索熟與生，索生與熟，索麤與細，索細與麤，與不平等，與不如法，於識不識，而與不與，於中數起相違語言，是名觶突。復有一類，若親教、親教類、軌範、軌範類，及餘隨一尊重可信，往還朋友，告言：具壽！汝於如是如是事業，應次第作，彼作是念：何事衆業，令我如是次第而作？於中數起相違語言，是名觶突。復有一類，或自來謝過，或他教謝過，或自有啓請，或他教啓請，於中數起相違語言，是名觶突。如是或因料理衣服，營造事業，於中數起相違語言，總名觶突。

云何饕餮？謂有一類，分財利時，捨一取一，情貪無定，是名為饕。前後食時，往飲食所，嘗此歡彼，好惡不定，是名為餮。此即及前，總名饕餮。

云何不和軟性？謂心剛強，心堅韌，心懽悞，心不明淨，心不潤滑，心不柔軟，心無堪任，總名不和軟性。

云何不調柔性？謂身剛強，身堅韌，身懽悞，身不明淨，身不潤滑，身不柔軟，身無堪任，總名不調柔性。

云何不順同類？謂有一類，於親教、親教類、軌範、軌範類，及餘隨一尊重可信，往還朋友，不正隨順，是名不順同類。

云何欲尋？謂欲貪相應諸心尋求，遍尋求，近尋求，心顯了，極顯了，現前顯了，推度構畫，思惟分別，總名欲尋。

云何恚尋？謂瞋恚相應諸心尋求，遍尋求，乃至思惟分別，總名恚尋。

云何害尋？謂害相應諸心尋求，遍尋求，乃至思惟分別，總名害尋。

云何親里尋？謂於親里，欲令安樂，得勝朋伴，無有惱害，成就一切無惱害法，王臣愛重，國人敬慕，五穀豐熟，降澤以時，緣此等故，起心尋求，遍尋求，乃至思惟分別，總名親里尋。

云何國土尋？謂於所愛國土人衆，欲令安樂，廣說乃至降澤以時，緣此等故，起心尋求，遍尋求，乃至思惟分別，總名國土尋。

云何不死尋？謂有一類，作是思惟：我於佛教所說勝定，且未脩習，先應誦持經律對法，爲諸有情，宣說法要，學諸傳記，製造疏論，居阿練若，但持三衣，廣說乃至隨得而

坐，作此事已，然後習定。復有一類，作是思惟：我於佛教所說勝定，且未脩習，先應歷觀山川國土、園林池沼、巖窟塚間，禮旋製多，遊觀諸寺，爲此事已，然後習定。復有一類，作是思惟：我於佛教所說勝定，且未脩習，待過七年、六年、五年、四年、三年、二年、一年，或過七月，乃至一月，或過七日，乃至一日，或過此晝，或過此夜，過此時已，然後習定。如是思惟：於自身命，不了危脆，起心尋求，遍尋求，乃至思惟分別，總名不死尋。

云何陵蔑尋？謂有一類，作是思惟：我之種姓、家族、色力、工巧事業，若財、若位、戒定慧等，隨一殊勝，持此方他，而生陵蔑，由此等故，起心尋求，遍尋求，乃至思惟分別，總名陵蔑尋。

云何假族尋？謂有一類，於非親族，託爲親族，欲令安樂，得勝朋伴，無有惱害，成就一切無惱害法，王臣愛重，國人敬慕，五穀豐熟，降澤以時，緣此等故，起心尋求，遍尋求，乃至思惟分別，總名假族尋。

云何愁？謂有一類，或因父母兄弟姊妹師友死故，或因親族滅亡都盡，或因財位一切喪失，便發自身，猛利剛獷，切心奪命，辛楚苦受，彼於爾時，心熱、等熱、內熱、遍熱，便

發於愁，已愁當愁，心中愁箭，總名爲愁。

云何歎？謂有一類，或因父母兄弟姊妹師友死等，便發自身乃至苦受，彼於爾時，心熱，乃至心中愁箭，由此緣故，而傷歎言：苦哉！苦哉！我父，我母，廣說乃至我財，我位，如何一旦，忽至於此，其中所有傷怨言詞，種種語業，總名爲歎。

云何苦？謂五識相應不平等受，總名爲苦。

云何憂？謂意識相應不平等受，總名爲憂。

云何擾惱？謂心擾惱，已擾惱，當擾惱，擾惱性，擾惱類，總名擾惱。

從貪瞋痴，乃至擾惱，皆名雜事；於此雜事，若永斷一，定得不還；以一斷時，餘容隨斷，故佛保彼定得不還。

說一切有部法蘊足論卷第九